

欽定剿平粵匪方略

欽定剿平粵匪方略卷二百六十八 辛酉年

七月初四日

庚寅

曾國藩奏言查二月二十日撫

建賊股竄擾樟樹鎮豐城等處省城戒嚴時藩
司張集馨在九江府城經臣屢催回省該員未
歸三月十一二等日湖北廣濟黃梅失守九江
震動張集馨蒼黃失措潛往廬山之白鹿洞書
院居住至四月初七日並未奉文卽自回省畏

蕙無能難資表率請

旨將藩司張集馨卽行革職仍懇

天恩迅賜簡放江西布政使兼總辦臣處糧臺以資臂

助江西按察使張敬修體弱多病難期振作合

併聲明奏入

上諭內閣曰江西布政使張集馨聞湖北警報輒由九江避回省城實屬畏蕙無能著卽革職以示懲儆江

有飭下兩廣督撫將廣東按察使一缺遴員署理一面
准臣行知彭玉麟俟軍務稍平再行奏請

陞見奏人

上諭內閣曰新授廣東按察使彭玉麟現在統帶水師
防剿賊匪一時未能赴任所有廣東按察使篆務著
勞崇光耆齡派員署理彭玉麟俟軍務稍平再行奏
請陞見

曾國藩又奏言查左宗棠一軍四月間追勦偽
侍王大股直至廣信旋因池州之賊再陷建德
將竄擾鄱陽景德鎮鄱陽失則江西之腹地可
危景德失則祁門之糧道又梗各處紛紛告急
臣亦疊次飛咨左宗棠不得已乃棄東路而同
救西路五月初七日由廣信行抵景鎮維時適
值嶺賊內犯黟縣被陷祁門建德兩路同警左

宗棠至鎮後派九營由桃樹店進剿二十二日
收復建德縣城而張運蘭等亦已攻克黟縣收
復徽州於是各路之軍民心爲之一定惟徽
郡衆嶺盤互羣賊環伺得之非易守之更難現
令張運蘭守郡城唐義訓守休甯朱品隆守祁
門而漁亭爲徽休糧路所關尙無防守之兵其
景德鎮爲全徽咽喉之路婺源爲皖浙綰轂之

區左宗棠兵僅七千能顧景德鎮卽不能兼顧
婺源漁亭連日籌商正苦不敷分撥而閩汀大
股賊匪由德興婺源上竄圖犯徽州左宗棠已
自統各營前赴婺源一面與張運蘭約會夾擊
閩汀之賊一面謀所以保守徽州兼保婺源饒
景之策臣暫駐江濱照料北岸其徽嶺內外及
饒州廣信各屬戰守事宜均賴左宗棠就近維

持以目下形勢而論左宗棠實不能分身赴浙
浙東賊勢浩大與江皖唇齒相依浙若不支其
患先及於皖次及於江臣亦知保浙卽所以自
保奈自鮑超北渡後南岸僅恃左宗棠一軍縱
橫策應七百餘里若無此枝雕勦之師則張運
蘭等孤懸嶺內糧路仍有必斷之勢徽郡終無
能守之理欲求保徽之方更無援浙之力顧此

則失彼圖近則遺遠再四籌思且愧且悚現惟
俟湖北江西攻勦得手或安慶克復有兵可分
再與左宗棠力謀援浙

同日毛鴻賓奏言查逆目李秀城渡贛江後由
吉安等處圖擾兩湖邊界臣到任時由咸甯蒲
圻一帶入境沿途訪察賊情惟通城民氣浮動
從前陷賊者多難保不潛歸煽誘賊匪若越通

界則巴陵臨湘湘陰等縣在在堪虞進行抵岳
州查知巴陵縣屬之茅田與通城僅距數十里
爲赴省捷徑較岳州尤爲緊要臣到省後卽調
提臣周寬世徑赴茅田兼顧羊樓洞地方其岳
州防務改調副將朱陞開等前往並咨催總兵
劉培元督帶師船剋日下駛與陸師聯絡布置
節據各路探報逆賊已竄陷通城關入蒲圻而

通山崇陽大冶興國等處土匪竊起其義甯路
城大股仍復築壘修濠意圖久踞現准督臣官
文調李元度防平之軍取道通崇與鄂師會剿
臣已飭副將趙福元迅赴平江接防兼擬添調
數營並進以期肅清鄂境又據南路各營縣稟
報粵西股匪由靈川竄向海洋坪參將江忠朝
等與總兵翟國彥分路夾擊突有騎馬賊數百

人自林中衝來步賊繼之參將林志等督隊截擊斃賊四百餘人而賊之前鋒已繞出官軍之前江忠朝等恐全州有失星夜入城設守五月初一至初十等日賊衆由麻子渡竄入灌陽分擾數十里內外現飭知州李明楷駐防永明江忠朝等扼守道州各要隘知府席寶田等駐四眼橋爲各路策應同知魏喻義駐軍藍山兼防

聞

嶺東錦田一路並與永道諸軍互通聲氣 臣復
密諭魏喻義江忠朝等約會粵軍及灌陽各處
團勇截其歸路毋任回竄以保完善之區均奏
入報

初八日 午 甲 曾國藩奏言官軍分駐祁黟休甯三
縣堅守嶺隘去冬今春石埭太平之賊屢次犯

嶺自臣移紮東流賊疑嶺內空虛欲合股竄擾
祁夥以斷糧路四月二十六七五月初一等日
羣逆糾踞嶺外琅田美坑余溪等處揚言分五
路犯嶺五月初二日賊由羊棧嶺蠶擁而入該
防所兵勢本單江長貫飭令王金鼎等率隊往
援叟雲慶亦統軍前往羊棧之賊方退而樟嶺
與方干嶺外賊衆麕集初三日各大股賊衆分

撲羊棧嶺方干嶺樟嶺其犯羊棧者賊數較少
原紮盧村之峯字禮字各營及霆營援兵禦之
賊不敢近其犯方干樟嶺者各軍竭力迎擊頗
有斬獲唐義訓正擬追逐出嶺不知賊已分股
繞襲後路潛陷黟縣城池唐義訓等軍回紮漁
亭賊竄至西武嶺下修築牆壘並分駐四都古
竹等村意圖窺伺柏溪進擾祁門初四日駐紮

柏溪之江長貴駐紮祁門之朱品隆駐紮休甯
之張運蘭駐紮漁亭之婁雲慶唐義訓商定兩
面夾攻初五日朱品隆率前營朱聲隆等江長
貴督領王金鼎等布列西武嶺上分途前進一
面圍攻賊壘一面抄擊村莊各壘及各村踞逆
賊不能支棄壘而遁其伏處各村之賊亦敗走
逃命張運蘭等由漁亭分三路進攻黟城至距

黔十里之石山橋悍賊堅守二卡老湘營正在
猛攻唐義訓急令隊伍馳助卽平賊壘四座婁
雲慶繼至併力合擊將賊卡拆毀乘勝追殺直
至城邊並將附城二壘擊破我軍分段環攻城
賊紛紛遁走當將縣城克復齊隊跟追餘匪翻
山越嶺而逃不復成隊合計斃賊二千餘名其
嶺外續至之賊分踞羊棧方干及樟嶺三處初

六日唐義訓等仍分三路進兵霆字禮字等營
從右路剿羊棧嶺老湘營從中路剿樟嶺強中
營從左路剿方干嶺賊之大股聚踞三都汪村
並於樟嶺口外築卡數座老湘營力擊三都之
賊唐義訓亦自左路往助將賊壘概行踏毀初
九日仍分三路進剿賊盡數併入盧村十都占
踞舊壘二座添築新壘五座守禦愈固老湘強

中等營四面埋伏先攻新壘賊黨死拒各軍奮力猛進四新壘以次悉平其一壘之賊逃聚盧祠內我兵圍攻生擒四百餘名惟餘舊壘二座正擬詰朝合攻該逆等已於三更遁出嶺外次日各軍跟蹤掃蕩諸嶺一律肅清徽郡之賊聞風膽落亦於二十三日分路遁去張運蘭帶隊至郡搜殺餘賊收復府縣兩城臣查此次羣賊

犯嶺袁國祥黃朝陞堵剿不力以致嶺防不守
賊得襲入黔縣雖係賊衆兵單究有應得之咎
暫革參將袁國祥參將黃朝陞均請卽行革職
不准留營開歸道張運蘭等調度有方應請分
別獎勵其餘出力人員容臣擇尤保奏陣亡員
弁並俟查明請

旨交部議卹奏入

上諭內閣曰此次逆匪竄陷黟縣官軍合力進剿旋即克復並乘勝收復徽州府城辦理甚屬得手暫革參將袁國祥參將黃朝陞堵剿不力以致嶺防失守均著卽行革職不准留營福建按察使張運蘭著交部從優議敘記名總兵降補遊擊唐義訓著開復原官副將婁雲慶著交軍機處記名遇有總兵缺出請旨簡放知縣朱聲隆著開復原官以同知歸安徽補用

徽州府知府劉兆璜歙縣知縣羅德隆參將文芳均著開復原官其餘在事出力人員及陣亡員弁著曾國藩查明奏請獎卹

曾國藩又奏言查福建水師提督楊載福征戰八年肅清江面近來賊氛愈熾而長江大湖之中終不敢與官軍爭衡實賴水師之功楊載福因母病沈篤請假四月除往返程途外在籍不

過月餘如果安慶克復此後征途愈遠爲日方
長可否准其回籍省親之處出自

聖主鴻慈如蒙

俞允所有江面事宜卽由該提督交總兵李成謀等防
剿可期得力奏入

上諭內閣曰福建水師提督楊載福著賞假四箇月回
籍省親

曾國藩又奏言查皖南四府一州羣盜如毛總兵統轄各營必須熟悉軍務之人方足以資鎮守總兵唐義訓前因徽州小挫奏請以遊擊降補此次克復黟縣肅清諸嶺收復徽郡最爲出力經臣奏請開復原官可否卽將唐義訓升署皖南鎮總兵之處出自

天恩又江西候補知府姚體備由知縣分發江西歷著

循聲上年經臣札調來皖委辦營務處不憚艱
險現奉

諭旨飭臣保舉道府大員該員堪膺斯選合無籲懇

天恩將江西候補知府姚體備以道員歸於安徽補用
卽令署理徽甯池太廣道缺於軍務地方均有
裨益奏入

上諭內閣曰安徽皖南鎮總兵員缺著以開復總兵唐

義訓署理江西候補知府姚體備著以道員歸於安徽補用並署理安徽徽甯池太廣道

曾國藩又奏言查僞侍王一股自三月在景德鎮敗退後竄至廣信一帶左宗棠追至廣郡李逆竄入浙江攻陷金華蘭谿等府縣此次徽州敗退之賊亦係李逆之黨半逃浙江歸併大股半逃甯國踞守下游僞忠王李秀城一股自竄

入江西瑞州後旁竄武甯義甯奉新靖安等處
近又竄入湖北之興國大冶武昌通山崇陽蒲
圻等屬僞主將劉官方一股竄鄱陽者經左宗
棠派隊擊退另股陷黟縣者經張運蘭等合力
擊退其大江北岸各賊如陳時泳踞德安賴汶
洸踞黃州暨各縣踞賊均係僞英王陳四眼狗
之黨陳逆又新從南岸邀僞輔王楊輔青一股

及林紹璋黃汶金二股來攻桐城救援安慶臣
處搜獲僞文數十件知各處賊股狂竄千餘里
無非欲分官軍之勢解安慶之圍現在胡林翼
力疾回救鄂省臣等往返熟商以安慶賊糧垂
盡必須力爭此城而後大局有挽回之望奏入
報

初九日

乙未

薛煥奏言

臣

歷次咨調揚州鎮江軍

營將弁均經都興阿等先後飭派來滬始得略
敷調遣現在兵勇日多尙須添員管帶查揚營
有江蘇候補遊擊林叢文貴州安南鎮都司楊
心純二員鎮營有貴州松桃協副將熊兆周湖
南副將文龍德二員皆足爲戎行表率惟大江
南北防剿均當喫緊之時自難令四人同時來

滬茲臣與都興阿等咨商請由揚營於林叢文
楊心純二員中酌派一員鎮營於熊兆周文龍
德二員中酌派一員飭令各帶親兵數十名前
來由臣委令管帶新募之勇合無仰懇

天恩迅飭都興阿巴棟阿馮子材酌派起程俾臣得收
指臂之助奏入

命軍機大臣傳諭都興阿巴棟阿馮子材曰上海防

勦喫緊新募各勇需員管帶副將文龍德一員前據
巴棟阿奏准仍留鎮江毋庸派令赴滬外其林叢文
楊心純熊兆周三員內著都興阿巴棟阿馮子材酌
量派委一員管帶親兵數十名前赴上海聽候薛煥
差委

薛煥又奏言青浦之賊經副將李恆嵩連次擊
敗提臣曾秉忠亦派已革知縣馮樹勳等管帶

水師藏船陸續駛泊城下屢次敗賊於西南兩門之外轟沈逆船多隻六月二十三日蘇賊大股麤至青浦城中亦出賊萬餘水陸密布勢極狡猾李恆學憑壘力戰斃賊數百人該逆襲北薛山營盤而陳坊橋及辰山之營均爲另股牽掣不能赴援駐紮鳳凰山之劉秉忠並未分兵接應又聞曾守忠等連日與賊接戰突被賊匪

擊沈礮船一隻擊損七隻已退至朱家角李恆
嵩恐該逆從他路抄襲直窺松江府城稟商曾
秉忠先將北簞山鳳凰山之兵退紮塘橋以顧
松郡門戶又將陳坊橋辰山各營次第移回廣
富林臣卽擬派兵由泗涇赴援乃嘉定之賊糾
同蘇逆馬步萬餘由南翔竄撲大場營卡經遊
擊王萬釗帶勇擊退該逆遂以大股窺伺真如

營盤又分股渡河撲犯野雞墩並北新涇鎮該處團練接仗失利賊遂直撲華漕營盤其時吳淞江南北兩岸一片賊氛距上海不過二三十里臣卽飭參將姜德等馳赴真如會同王萬釗堵禦一面飭令參將郭太平援剿並令知縣劉卹膏親帶團勇相機堵擊又飭都司劉士奇等分帶南勇捷勇會同知縣田濤等所帶礮船水

陸接應二十四五六等日郭太平王萬釗等將
撲犯真如之賊擊退梁勝章等將劉行鎮之賊
斬殺殆盡惟華漕竄賊先經都司葛春陽等擊
退復糾股前來圍撲並分股竄撲諸翟鎮牽掣
梁勝章派援華漕之師臣飛調郭太平由真如
率隊赴援行抵北新涇因賊熾未能前進臣復
令遊擊金文廷等分路進兵速援華漕不意金

文廷等尙未達到而該營參將汪占魁已因援兵隔絕突圍而出葛春陽等營勇丁亦相率潰退金文廷等卽會同郭太平督率各軍分三路轉戰而進槍過濠溝遂登營牆生擒賊目數名將營盤兩座奪回留兵駐守餘賊向南翔一帶逃竄是日諸翟之賊由諸翟後路各負門板來撲營盤王國安於該鎮東南一帶沿河截剿梁

勝章督率兵勇迎擊殺賊無算該逆又合股護
擁而前王國安衝入賊隊手刃賊目六名張國
康揮軍進擊逆衆奔潰王國安疾馳追勦該逆
紛紛落水拋棄門板刀子不計其數梁勝章亦
將包抄營盤之賊擊敗擒斃匪黨多名王國安
回軍合擊大獲勝仗該逆遂繞由黃渡竄回嘉
定巢穴臣於賊偪華清時亟商提臣曾秉忠派

撥得力水師前來助剿曾秉忠因北幹山等處
撤退營盤當派遊擊曾繼榮等擊賊於鳳凰山
天馬山楊家澳均獲勝仗轟斃逆匪百餘名李
恆嵩亦將撲犯塘橋之賊擊斃百餘名餘匪均
回青浦城中曾秉忠遂親督礮船駛抵七寶鎮
知華漕之營已復諸翟之圍已解遂飭礮船十
號令守備康家斌等仍在野雞墩一帶巡防而

自回泗涇策應臣亦飭各軍回防聽候調遣查
華漕營盤被陷之際梁勝章與王國安合力堅
守得以保全合無仰懇

天恩俯准分別獎勵其各營僉事人員應請分別懲儆
奏入

上諭內閣曰蘇州逆匪大股救援青浦旋撲塘橋經副
將李恆嵩及曾秉忠所派水師擊敗其竄近上海分

撲諸翟營盤之賊亦經遊擊金文廷等督軍進剿賊
衆奔潰剿辦尙屬出力參將梁勝章著以副將升用
先換頂戴王國安著賞加副將銜其餘出力員弁著
薛煥查明存記彙案請獎都司劉秉忠撤營先退參
將汪占魁不能堅守營壘均著拔去翎枝卽行革職
發往新疆充當苦差都司葛春陽守備苟定玉杜啟
發不能約束勇丁任聽潰退均有應得之咎葛春陽

苟定玉均著拔去花翎杜啟發著拔去藍翎以上三員一併暫行革職留營以觀後效副將李恆嵩輕進失利著交部議處參將郭太平援救華漕遲延旋擊賊奪回營盤功過尙足相抵著免其置議

薛煥又奏言查嘉定之賊撲陷大場營卡當經王萬釗由真如帶勇擊退該逆以大股窺伺真如營盤復以零匪仍赴大場搶擄經督辦團練

大臣龐鍾璐飭勇直衝入鎮將匪擊散該逆復分股竄撲野雞墩北岸當經知縣劉卹膏調團堵禦賊不能渡遂分股由安上渡繞襲野雞墩之後定勇民團腹背受敵賊遂由野雞墩徑竄北新涇劉卹膏親帶惠勇約會郎中潘曾瑋等馳赴該處會團迎剿賊卽聞風退去二十六日賊復渡江圍攻華漕營盤仍圖撲北新涇其時

參將郭太平已由真如帶勇前來會同劉鄆膏
將北新涇鎮附近之賊擊退駐紮該鎮二十八
日郭太平督飭各軍進攻華漕惠勇奮力當先
民團亦相繼而進軍威大振賊衆潰竄奏入報

十二日戊戌崇實奏言粵逆前竄貴州畢節縣境

逼近川疆臣派道員音德布等前赴敘永會同

地方官防堵旋據稟稱該逆圍攻畢城糧食缺乏勾結黔省青苗等匪分股竄擾川境參將祥符等督兵過河接仗該逆紛紛敗退分竄大河口小河口等處姜吉兆等馳赴大河口據守礮臺該逆於上游梟水爭渡勢甚猖獗我兵沿河扼守並於山腰設伏以待該逆涉水甫至中流兵勇礮斃賊匪無算登岸之賊均經山半伏兵

截擊該逆當卽卻退我軍乘勝跟追樹林內復
有伏賊出拒又經同知祝兢等從大溝渡趕到
併力夾擊槍斃賊目數名賊遂退走撲河淹斃
者不計其數餘匪悉竄黔西州屬之打鼓新場
又結土教各匪距川疆僅數十里意圖窺伺敘
永聰照磨高其相卽領練勇赴白楊坪駐紮該
逆分股來撲高其相督衆迎敵手刃數賊林內

伏賊突出高其相受傷陣亡適姜吉兆等帶練
趕到該逆抵死抗拒我軍排槍轟擊賊不能支

乘勢追剿斃賊多名敗匪現已遠竄並據貴州

提臣田興恕咨派撥兵勇立解畢節城圍餘匪

仍由瓢兒井一帶回竄黔西大定現派兵勇由
開道繞出賊前迎頭截擊惟查瓢兒井另有徑
路可達仁懷屬之茅垵村與川省綦江南川兩

縣毗連臣已飭地方官多調團練嚴密防堵務
使逆匪不能竄越此次照磨高其相臨陣捐軀
仰懇

天恩飭部從優議卹奏入

上諭內閣曰粵逆圍攻貴州畢節縣城並勾結黔省青
苗等匪竄擾川境經參將祥符等連次擊退餘匪奔
竄黔西之打鼓新場等處又經知縣姜吉兆等督練

堵截斃賊多名敗匪遠竄仍著崇實嚴飭在事員弁
兵團嚴密防剿毋任竄越陣亡之敘永廳照磨高其
相著交部從優議卹

同日慶端瑞璜奏言查江山常山兩城均已克
復惟乍浦仍爲賊踞金華蘭谿先後不守另股
皖逆復入嚴州府屬之淳安壽昌踞匪時出焚
掠偏近龍游其江山之賊又蔓延處州緊偏溫

州各屬寇氛紛乘勢將盡歸糜爛臣等前派道員張啟煊統帶臺泉壯勇暨都司黃大雄等軍由浦城馳赴衢州嗣因金華失陷賊勢趨重紹興飭由松溪取道處州進援並添派候選道馮席珍管帶弋陽勇二千名一併援浙現在浙江藩司林福祥統師抵衢臣等已將馮席珍一軍改歸林福祥統帶俾厚兵力一面飛催張啟煊

倍道馳援惟溫州防兵單薄該郡上通台紹下
接福甯又水路可達甯波實爲閩浙藩籬臣等
現擬簡選得力壯勇由海道馳赴溫州堵剿並
飭福甯鎮府將上年調派之福甯各營兵丁一
千名剋日出營以七百名赴福鼎三百名赴壽
甯扼要堵守所有援浙各軍糧餉均經臣等寬
爲籌給以利遄行至總兵曾玉明副將林文察

聞

所帶臺勇屯丁業已陸續酌撤林文察派員赴臺另募該二員現在管帶臺兵勇丁均止五百餘名分赴浦城防堵故此軍未能調派赴浙臣等總當隨時籌商援應以保大局奏入報

慶端又奏言據護乍浦協副將葉長青稟稱三月初九日賊由海鹽竄犯乍浦爬入城垣該員

欽定四庫全書
平定回疆方略卷六十八
三
接戰受傷查葉長青於賊匪攻撲時不能固守
待援以致地方失陷雖據報打仗受傷究難辭
咎相應請

旨將護理浙江乍浦協副將事請升玉環營參將葉長
青先行革職責令隨同收復地方以觀後效此
外武職員弁如何下落該護副將葉長青是否
聞警先逃均俟飭查明確分別辦理奏入

上諭內閣曰護理浙江乍浦協副將葉長青於賊匪攻
撲乍浦時不能固守待援以致地方失陷實難辭咎
葉長青著先行革職責令隨同收復地方以觀後效
並著該督查明該員如有聞警先逃情事卽嚴叅懲
辦其餘武職員弁下落一併查明具奏

十四日 庚子 官文曾國藩奏言道員曾國荃率所

部各營將關外逸賊搜捕淨盡而城賊仍恃菱

湖南岸賊壘五座北岸賊壘十三座以拒官軍
五月十五日後城賊壘賊陸續逃出乞降曾國
荃察其從逆久而兇悍者斬之二十四夜菱湖
壘賊吳定才率賊來撲橫濠曾貞幹等大呼出
擊賊衆敗退嗣我軍於齋壇埂棊盤山等處水
陸進攻屢有斬擒而察看菱湖南岸賊壘內與
安慶北門犄角外與北岸十三壘氣脈貫通曾

國基遂派凌蔭廷等各率弁勇直逼北門城下
橫紮六營以截城賊接濟之路曾貞幹又派李
祥和駐守齋壇橋以截水路賊糧三十日菱湖
北岸壘賊與城賊數千人直撲北門新營經凌
蔭廷等擊斃賊匪三百餘名逆衆大卻西門之
賊亦經彭毓等擊敗是夜菱湖北岸壘賊紛紛
爭渡入城又爲水師轟擊落水死者不計其數

曾國荃等復率曾貞幹等出淞擊賊益慌亂
我軍陸師各營齊隊圍攻巡湖水師各營又從
水面抄擊賊已無路奔逃各營官率勇登壘生
擒賊衆五千餘人釋放新脅賊衆三百餘人水
師蔡國祥復會同陸師蕭孚泗等攻破菱湖南
岸賊壘五座斬賊一千餘名菱湖南北兩岸賊
壘一律肅清查安慶居皖鄂之交爲該逆所必

爭數月來逆首陳玉城節次糾黨回援經多隆
阿於掛車河等處擊退殲賊甚夥鮑超等復斬
悍賊數千於赤岡嶺我軍聲威倍振遂復攻克
菱湖兩岸賊壘斬馘九千有奇該逆外勢旣失
城賊心膽已寒現在曾國荃等督率各營將士
並商同水師逼近城根晝夜環攻惟偵知陳玉
城自前次敗遁後又糾合徽甯僞輔王楊逆率

黨上犯圖援安慶臣等醇飭各軍慎密戒備力
圖攻克堅城盡殲醜類此次出力員弁兵勇可
否籲懇

天恩由臣等專案保獎以昭激勸奏入

上諭內閣曰官軍圍剿安慶經卽用道曾國荃督率所
部各營水陸進攻已將菱湖南北兩岸賊壘一律蕩
平仍著官文等督飭各營將士乘勢進剿速拔堅城

此次出力員弁兵勇准其專案保奏候朕施恩

官文胡林翼奏言本年二月逆匪竄陷黃州分
股上犯德安隨州等處僞忠王李秀城又由江
西瑞州義甯武甯等處擾及湖北南岸各州縣
臣官文因精銳盡出征皖本省兵力單薄致轄
境多有疏虞臣胡林翼專務前敵疏於慮後所
屬地方未能先事豫防均難辭咎應請

自交部議處奏入

上諭內閣曰本年二月間逆匪竄陷湖北黃州並分陷
德安隨州等處該督撫未能先事豫防均難辭咎官
文胡林翼著一併交部議處

同日楊載福奏言臣前至東流縣與曾國藩面
商進剿機宜曾國藩以江水盛漲囑臣酌帶數
營礮船往攻池州以牽南岸賊勢就近調派總

兵李成謀等率正右等營並總兵黃翼升所部
淮揚水師新左正後等營先赴該府繞城環攻
臣於五月初九日親督護衛營三板馳往李成
謀等業經攻剿數日已有援賊趕到臣卽派各
營在東南西三門轟擊該逆出城來撲臣督同
黃翼升等帶隊登岸攻剿賊復退入城內連攻
數日賊援益多因思水師各營均從扼守要處

調來萬一要處有失則利害較然因分遣正左
並淮揚水師新左正後等營仍同原防要地臣
惟帶李成謀等三營駛抵舊縣該處自四月以
來荻港三山鎮各地面均爲悍賊往來蹂躪經
派防該處總兵李朝斌等痛剿多次先後生擒
賊目二十餘名餘賊五百餘名轟斃無算並陣
斬逆首黃汝金之弟僞拈天侯賊蹤稍戢臣復

留李成謀等二營在彼會同防勦探聞江北無
爲州神塘河口濱江賊壘被水淹浸壘賊移進
裏河修築新壘甫成臣卽帶李成謀等五營入
神塘河分路抄擊賊勢不支棄壘奔竄當派李
成謀鎗平新壘暫紮該處以防竄賊一面派羅
宏裕帶隊疾追直抵該州北門城下開礮轟擊
李朝斌帶三板駛至東門攻賊礮船丁泗濱繼

之彭楚漢亦卽趕到合力轟擊船賊紛紛敗竄
其東北二門賊船經李朝斌等焚燬三十餘號
斃賊無數生擒賊目四名餘賊七百餘名適值
陳玉城楊輔青等屯聚該州城內衆軍薄城城
賊死力抗拒未能卽下臣於二十六日回次大
通帶都司劉連升等及該處團練裴人傑等往
青陽察看甫抵該縣北門橋邊賊卽出撲羅宏

裕登岸截殺裴人傑帶練繼進劉連升揮令各
船開礮力轟該逆敗退六月初五日臣仍帶護
衛營礮船回黃石磯駐紮查下游府州縣踞城
之賊但有官兵往攻彼卽憑城堅守迨經數日
則援賊踵至故欲下一城必須會合水陸全力
持久始能有功臣所統水師除派防下游各要
隘外留九營於樅陽以便內湖外江與陸師併

攻安慶奏入報